

**Naaja H. Nathanielsen
Attaviitsoq**

**UPA 2016/82
20. april 2016**

Inatsisartut aalajangiiffigisassaattut siunnersuutigineqarpoq Naalakkersuisut peqquneqassasut Peqqinnissaqarfiup aqunneqarnera, aqqissuussaana kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. November 2010-meersup § 3, imm. 2 naapertorlugu kingusinnerpaamik 2017-imi, Naalakkersuisut tarnip pissusaanik ilisimasallit peqqinnissaqarfiup iluani, pisortat oqartussaasuini allani namminersortunilu ilinniakkaminnut tunngasuitgut silinerat pillugu malittarisassanik erseqqinnerusunik aalajangersaanissaat.

(Inatsisartunut ilaasortaq Steen Lyngé, Atassut)

2010-mi Inatsisartut inatsimmik akuersinermikkut Naalakkersuisut tarnip pissusaanik ilisimasallit sulinerannut malittarisassiorsinnaatilerpaat. Tamanna pivoq kina imminut tarnip pissusaanik ilisimasalittut taaguusersinnaanersoq, tarnip pissusaanik ilisimasallit suut pisussaaffiginerai minnerunngitsumillu innuttaasut tarnip pissusaanut ilisimasalinnut pikkorluttunut illersornissaat pisariaqarmat. Taakku malittarisassat nalunaarusiortussaasimapput, tamannali suliarineqarsimanngilaq. Maanna ukiut arfinillit qaangiutereerput. 2011-mi nalunaarusiassamut missingersuut ajunngilluinnartoq tusarniaassutigineqaraluarpoq. Sooq suliaq unitsinneqarpa? Siunnersuutigineqartoq tapersorsorpara, siunnersuutiginnittorlugu qutsaviginiarlugu sammissaq ukkatassanngortimmagu. Pingaarluinnarpoq suliap naammassinissaa. Pisussaavugut suliaq naammassissaallutigu tarnip pissusaanik ilisimasallit suliaqarnerminnut piumasaqaatinut ileqqorissaarnermullu malittarisassaanut unioqqutitsillutik sulisut innuttaasunik sullissinerlunissaat ungalassimaniarlugu. Sammineqarpummi inuit saanngiitsut ersarissumik maalaaruteqarnissaminnut periarfissaqanngitsut, tamannalu ulloq mannamut tikillugu pisunit pimoorussinerujussuulluta iliuseqarfigisariaqarparput. Siunnersuut taamatsillugu akueraara isumaqarlungalu ataatsimiititaliami suliarinninneq pisariaqanngitsoq.